

SOGAMA: CONTAMINACIÓN OFICIAL

ADEGA-Cerceda

NOS PASADOS MESES DE MAIO E XULLO O RÍO LENGÜELLE VOLVEU SER VÍCTIMA DO CONTINUO VERTIDO DO BASUREIRO QUE SOGAMA TEN NA AREOSA, NO CONCELLO DE CERCEDA. AS TROITAS QUE POBOABAN O RÍO FORON ASASINADAS POLOS LIXIVIADOS DO VERTEDOIRO CO CONSENTIMENTO DE AUGAS DE GALICIA, QUE RECENTEMENTE AUTORIZOU O VERTIDO. NUNHA PAISAXE DESOLADORA PROVOCADA POLA POLÍTICA ANTIMEDIOAMBIENTAL DA XUNTA, O POBO DE CERCEDA E COMARCA VIVE DÍA TRAS DÍA AS GRAVES CONSECUENCIAS DA INSTALACIÓN DUNHA INCINERADORA DE LIXO E DUN VERTEDOIRO Ó QUE CHEGA O LIXO DE CASE TODA GALIZA. OS CHEIROS NAS PROXIMIDADES DO COMPLEXO INCINERADOR COMEZAN A SER MOTIVO DE REITERADAS DENUNCIAS VECIÑAIS.



A xente de toda a comarca ten que sopportar a contaminación da central térmica de Meirama (o fondo da foto), e da incineradora de SOGAMA (na foto a dereita da central térmica).

UN VERTEDEIRO QUE NON PARA DE MEDRAR

Xa hai máis de sete anos dende que a Areosa comenzou a ser o vertedeiro d@s galeg@s. Inicialmente, o concello de Cerceda firmara un convenio con Sogama polo que o basureiro tería unha capacidade para 200.000 toneladas de lixo. Pero esta cantidade pronto se volveu ridícola para enterrá baixo un céspede relocente o lixo que camións e camións transportan as 24 horas do día dende todo o país. Así, pasados dous anos, o acordo entre o concello cercedense (PSOE) e a Xunta de Galicia (PP) ampliouse ata 500.000 toneladas. Esta capacidade tamén resultou insuficiente e tras outros vintecatro meses asinouse un pacto polo

que a Areosa podería acoller lixo, sen límite de capacidade ata xuño do 2000. A partir desta data, teóricamente, non se podería verter máis lixo, pero hoxe en día, pasado máis dun ano, os camións do lixo seguen chegando a Cerceda sen importar que o convenio estea caducado nin que se estea rematando coa pouca fauna, flora e saúde medioambiental que quedaba na comarca.

A mal chamada pola Xunta SOciedade GAlega do Medio Ambiente pediu permiso á institución Aguas de Galicia para poder verter de xeito continuado e sistemático lixiviados ó cauce do Lengüelle, (dende o vertedoiro da Areosa), e ó do río Barcés (dende a incineradora de lixo). A Administra-

ción galega concedéulle o permiso e isto non trouxo máis que graves problemas ecolóxicos como a morte de tódalas troitas que poboaban os ríos.

Por outra banda, hai unha consecuencia aínda peor, se pode ser: os habitantes do concello coruñés de Carral reciben a súa traída de auga directamente do Barcés, e este río á súa vez vai parar ó embalse de Cecebre que abastece a cidade da Coruña. Sen embargo, o gran descontento da xente de Carral non parece importar ó particular programa da Xunta de Galicia. No Lengüelle prodúcese un caso análogo: este río desemboca no Tambre, do que se recolle a auga que beben e usan os composteláns.

Entón, partindo do feito de que os lixiviados de Sogama son capaces de matar absolutamente tódalas troitas, incluso as más grandes, que poboan un río, ¿cál é o futuro a medio e longo prazo que lle agarda ós homes e mulles dos dous núcleos principais da provincia da Coruña que consumen esa mesma auga contaminada?

ADEGA está denunciando continuamente ó SEPRONA estes atentados ecolóxicos sen recibir ningún tipo de resposta positiva para o medio ambiente. Hai cinco anos, con motivo dunha denuncia da Asociación, Sogama actuou deixando ver claramente cales son as súas prioridades. Os lixiviados eran vertidos ó río Lengüelle a través dunhas tuberías visibles que había na parte posterior do basureiro da Areosa. A Sociedade Medioambiental da Xunta e Unión FENOSA mercaron os terreos colindantes co vertedoiro de lixo para así poder soterrar ó seu gusto as tuberías, silenciar o delito e continuar vertendo ó río dunha maneira menos obvia.

OS VERTIDOS DA INCINERADORA

Coa posta en funcionamento da incineradora de residuos sólidos urbanos os problemas non mermaron. Aínda non fai un ano dende que o complexo de Sogama comenzou a incinerar e a pesar de que aínda non traballa a pleno rendemento as consecuencias para o medio déixanse apreciar.

As fontes que había nas inmediacións da planta de residuos secaron todas e o chamado Rego da Iña, un regato que levaba o seu curso polo lado da incineradora, pasou a ser un caudaloso río transportador de todo tipo de lixo que escapa de Sogama ou que lles sobra alí. Así, unha vez máis, os ríos volven ser o destino do lixo provocando que o cauce do Rego da Iña aumentara considerablemente gracias ós lodos e residuos procedentes do complexo de incineración da Xunta.

VACAS TOLAS OU SOGAMA TOLA

O asulagamento do Rego da Iña coincidiu no tempo coa aparición da Encelopatía Esponxiforme Bovina en Galiza. Tras o escándalo feito público do enteramento de vacas en Mesía, a Xunta mirou de ser más cautelosa nas súas actuacións sen que isto implicara

afrontar con eficacia a crise gandeira.

A Administración galega axiña se percatou de que o mellor lugar para desfacerse das reses que estaba a matar de xeito indiscriminado era o vertedoiro de RSU da Areosa. No medio de tanto lixo ninguén se decataría destes animais, ou no seu defecto das súas fariñas, que a propia Unión Europea califica de Materiais Específicos de Risco.


Segundo a política de xogar ás agachadas ante semellante barbaridade ecolólica e sanitaria que estaba a cometer, a Xunta comenzou a enviar camións rumbo a Cereda. Pero esta vez non todos ían cargados de lixo, senón que ademáis transportan animais e fariñas dos que se había que desfacer. Os mandatarios galegos encargáronse de que isto nunca saíra á luz para que non se repetisen as fotos e noticias en portada como acontecerá no caso de Mesía. Deste xeito, o vertedoiro de RSU de Cereda convertíuse nun improvisado depósito de MER, incumprindo totalmente a normativa que sobre este tema dictamina a UE, xa que todos estes materiais deben ser tratados nun lugar específico para eles e non nun basureiro de lixo.

Todas estas actuacións contaron sempre co apoio incondicional do Goberno cerdedense. O alcalde socialista, José García Liñares, sempre negou que na Areosa se estiveran enterrando vacas. Sen ambargo, o acceso ó vertedoiro do delito está prohibido para toda persoa que queira ver cos seus propios ollos as mentiras de Sogama.

Deste xeito, Cereda e comarca conseguе ser un microespacio no que todo val. Caracterizado polos cheiros nauseabundos procedentes da incineradora e do vertedoiro, o pobo cerdedense pode presumir de ser, a cambio de promover unha política contra-ambiental, o concello galego con maior presuposto municipal por habitante.

A INCINERACIÓN NON É A SOLUCIÓN

Dende ADEGA sempre se criticou o plan de RSU da Xunta de Galicia baseado na incineración de lixo. E é



Vertedoiro de SOGAMA na Areosa (Cereda).



Troitas mortas no río Lengüelle

que a todas estas consecuencias describas hai que sumar a grave contaminación que supoñen os centos de camións e trens que transportan o lixo día e noite con destino a Sogama, e o despilfarro enerxético que implica un complexo do que a Xunta presume de que sexa un dos máis modernos de Europa.

Cando xa en distintos lugares do Estado español se están pechando as plantas incineradoras de lixo por estar comprobada a alta xeración de dioxinas que producen, o Goberno de Manuel Fraga segue apostando forte por esta maneira de tratamento do lixo en lugar de optar por unha solución más ecológica e saudable baseada na reciclaxe.

A Consellería de Medio Ambiente, dirixida por Carlos del Álamo, Unión Fenosa, a Xunta e o concello de Cereda demostran unha vez máis qué é o que os move: facerse ricos a cambio de rematar coa riqueza do país. Quizabes o día en que non existan os ríos, nin un só peixe sen dioxina, nin unha soa persoa sen enfermidade, e cando o vertedoiro da Areosa revente e con el toda a saúde da comarca, daranse conta de que a boralla non se come.